

Date – 11/06/2025

Time - 18:30 Hrs

HEADLINES (EVENING)

1. Green Mizoram Day pualin vawiin khan Mizoram hmun hrang hrangah thing tiak phun a ni a, "Ruahtui khawl nan thing i phun ang u" tih thupui hmangin hun hman a ni.
2. Kum 11 chhunga BJP sorkar hnathawh hrang hrang tarchhuahna Exhibition chu Aizawla BJP Office ah vawiin khan hawn a ni.
3. Prime Minister Narendra Modia chuan NDA kum 11 sawrkar chhungin hmasawnna ruhrel nasa takin a thang tih a sawi.
4. Union Cabinet chuan Railway Ministry hnuai project pahnih cheng vaibelchhe sang 6 leh 405 hu a pawm.

<><><>

GREEN MIZORAM DAY

Green Mizoram Day pualin vawiin khan Mizoram hmun hrang hrangah thing tiak phun a ni a, "Ruahtui khawl nan thing i phun ang u" tih thupui hmangin hun hman a ni.

Larsap Gen (Rtd) Vijay Kumar Singh te nupa chuan Raj Bhavan-ah Green Mizoram Day pual hian Raj Bhavan ah Herhse tiak an phun a ni.

Larsap chuan Mizoram mipuite chu thing phun leh enkawl zui kawngah theihtawp chhuah turin a chah a ni.

Environment Forest & Climate Change Minister Pu Lalthansanga hovin Green Mizoram Day hi Thenzawl-a Golf Course & Resort ah hman a ni a,

Pu Lalthansanga chuan Mizoram hmun hrang hrang a tuihna a tlem tak nachhan chu a ram leilung neitu ten neitu rilru pu lova, mikhual rilru put avanga ram ngaw an tih chereu zel vang a ni a ti a. Thing tiak te lutuk phun chu a dam chhuak tha lova, a lian sa chauh phun an tum tawh a ti a, ram ngaw humhalh na kawngah leh plastic bawlhhlawh te paih mai mai lova a paih dan tur dik taka paih thin turin mipuite a sawm a ni.

He hunah hian lawmman hrang hrang sem niin kangmei venhimna kawnga District hma la tha ber chu Lunglei District niin , 2-na Serchhip District, 3- na Aizawl District an ni a.

Ramngaw leh nungcha humhalh kawnga hma la tha lawmman latute chu Zuchhip Br YMA, Sairep Village Community leh Sub-Hqrs YMA Serchhip te an ni.

Hei bakah hian Serchhip District chhunga kangmei venhim kawnga hma la tha lawmman sem ni bawkin, 1-na Leng, 2-na Zote South bakah 3-na Ngentiang khua te an ni.

Green Mizoram Day hi District dangah pawh uar taka hman a ni a, thing phun bakah phun tawh sa enzui hna te thawh a ni.

<><><>

COOPERATION

Cooperation Department changtu Minister Pu PC Vanlalruata'n Mizoram Sorkar tharin a ngaih pawimawh em em Bana Kaih policy hnuai MIZOFED hnuai Primary Society 350 dawnte din chhuah tir dan tur ngaihtuah tha a tih thu a sawi.

Vawiina Synod Conference Hall-a MIZOFED Annual General Assembly vawi 27-na a hmanpuinaah thusawiin Minister chuan, Sorkarin Cooperative Movement a ngaihpawimawh chhan chu mipuiten an thawhhona atanga thawhchhuah an neih te leh chumi avanga hmasawnna tlo leh tlantling, sustainable development hrang hrangah ramin a hlawkpui thin vang a ni a ti a, UNO-in kumin hi Year of International Cooperative-ah a puan angin Cooperative hmangin Mizoram pawh Mizoram tha zawk siam an tum ti a. Mizoram Sorkar tharin a ngaih pawimawh em em chu bana kaih policy a ni a, chu mi hnuai chuan bana kaih ngaite bana kaih an tum tih a sawi a,

MIZOFED hnuaia Primary Society 350 dawnte chu bana kaih an ngai em tih ngaihtuah a, engtin nge an din chhuah tir ang tih chu ngaihtuah ho turin a chah a ni.

Minister chuan, Sorkarin thlai thar a leite kaltlangin society-te nena thawh ho dan an ruahman a, kuminah enchhinin, a kum thumnaah chuan society tha tak tak khaw tam takah a pian theih an beisei a ti a, chu chuan Mizoramah hmasawnna thar a pek ngei an ring tih sawiin, Mizote chu Kohhranah thawkho thiam tak ni mah se, Society angin an thawkho thiam tawh lo nia a ngaih thu a sawi a, thangthar zawkte, lehkhathiam zawk te, society-ah Cooperative Movement-a an hnuh luh chhoh zel chuan kalphung fel tak hnuaiah thawhhona tha tak awmin, Mizoramah Cooperative movement-in hma a sawn ngei a beisei thu a sawi a ni.

Tun dinhmunah MIZOFED hian Mizoram hmun hrang hrangah Petrol Pump 10 neiin, tanker 46-in an chawm a, kum 2024-25 chhung khan tuialhthei an hralhna atangin cheng Vbch. 7, nuai 56, sing 5, sang 8 leh 779 an hlep a, District 6-ah LPG Distributor neiin, sorkar kum liam taah khan cheng Vbch. 3, nuai 24, sing 3, sang 5 leh 989 an hlep bawh.

<><><>

11 YRS MODI GOVT

Kum 11 chhunga BJP sorkarin ram tana rawngbawlna, rorelna tha leh miretheite hamthatna a thawh tawh hrang hrang phochhuahna- Exhibition chu vawiin khan BJP National Secretary leh Spokeperson Anil Antony an Aizawl Upper Republic a Mizoram BJP office Hall-ah a hawng.

Exhibition hawnna inkhawm tawiah thusawiin, Pu Anil Antony chuan Prime Minister Narendra Modi-a kaihhruai NDA sorkar chuan kumin May thla khan a kum 11 chhung sorkarna a zo fel a, kum 11 liamta chhung khan ram chhungah inthlak danglamna nasa tak a thleng a ti a. Vawiina Exhibition -ah hian kum 11 liamta chhunga ram chhung hmun hrang hranga hmasawnna leh inthlak danglamna thleng te phochhuah a ni a, Prime Minister Narendra Modi-a kaihhruai sorkar hnuaiah hmasawn hnathawh hrang hrang thawh mek a ni a, hmarchhak bialah pawh thawh mek niin, Mizoramah chuan cheng vbc sang 8, 400 chuang sengin rel kawng kilomtre 52 a sei siam a ni a ti a. Prime Minister Pu Narendra Modi kaihhruaina a hmalakna tarlanna Exhibition buatsaih hi India ram chanchin, hmasawnna kawng a zawh dan hrang hrang te hriat fiah theihna a nih avangin Mizo mipui te chu tlawh turin a sawm a ni.

Exhibition hi tun thla chhungin nitin chawhma dar 9 leh a chanve atanga tlai dar 4 thleng tlawh theih a hawn a ni a. BJP Mizoram State President Pu Vanlalhmuaka pawhin Exhibition ah hian Prime Minister Pu Narendra Modi kaihhruai Kum 11 chhunga hnathawh an tarlan te chu tlawh theuh turin Mizo mipui te a sawm a ni.

<><><>

SIAHA

Siaha district Siaha leh Lawngtlai inkar ah Tisopi lei chu ECM Kohhran Tipi ferry hmalakna tunkar tir atang khan dawh tan a ni a. He lei hi Abikin Amôtlah tlangdung khaw 4 -Tipi Ferry, Riasika, Amotlah leh Thiahra khua ten khawpui lama chak an lakna kalkawng a ni.

Kan corr sawi danin, he lai tlangdung khaw 4 hi Chhimtuipui lui leh Tisopi lui in a karcheh a, fur tui lian laiin Lei a awm loh avangin ei leh in lakna kawngah an buai hle thin a. Kum 2023 khan Bailey bridge dawhna tur an bialtu MDC Pu HC Lalmalsawma Zasai hmalakna in dawh tan a ni a. Thir dah tur hian contractor hran a ngaih avangin tender hran chhuah a ni a, kumin 2025 thal chhunga dawh zawh hman an beisei laiin contractor te hian hna an tan thei ta lova, lei awm chhun seasonal bridge chu tuilian in a lak tak avangin inkalpawhna a awm ta lo a ni.

ECM Tualchhung kohhran Tipi ferry chuan Kohhran sum atanga dawh turin hma an la a, He thu an hriat hian bialtu MDC leh District Administration (DM&R) lam te hmalakna in cheng nuai 1 chu sanctioned a ni a, lei hi cheng nuai 2 atanga nuai 3 vel seng turah a in ngai a ni.

<><><>

CROP INSURANCE SCHEME

Hriat lawkloh harsatna laka thlai thar te veng tura hmalakna Crop Insurance Scheme – Pradhan Mantri Fasal Bima Yojana (PMFBY) for 2025–26 chu Chief Minister Pu Lalduhoma kaihhruaiin vawiin khan thlirho a ni a.

Agriculture Minister Pu PC Vanlalruata, Agriculture official leh Finance Department aiawhte meetingah hian an kal a ni,

He scheme hian leilung chhiatna hrang hrangn tuilian, khawkheng, leimin, ramkang, rial, tek leh ramsa in a suasam sak lakah te bakah rannung in a eichhiat sak avanga sum loh tur laka invenna tur a keng a, kuminah hian state sorkar chuan Agriculture Insurance Company of India nen thawkdunin he insurance hi an kalpui dawn a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

NDA @11 YEARS INFRASTRUTURE

Prime Minister Narendra Modia chuan NDA kum 11 sawrkar chhungin hmasawinna ruhrel nasa takin a thang tih a sawi. Social Media-ah he thu hi tarlangin Pu Modia chuan relkawng, kawngpui, lawngchawlhna leh airport lamahte nasa takin hmasawinna a thleng a ti.

Kum 11 chhung hian ramchhung inkalpawhna lama hmasawinna ruhrel tam tak din thar a nia . Kawngpuite chak taka siam niin chawhrualin nikhatah km 34 zel siam zo anga chhut a ni a. Hei hi kum 2014 aiin a let thumin a pung a. Bharatmala Pariyojana hnuaiah highway km sing 3 chaung siam a ni tawh. Railways lamah pawh hmasawinna thengin relkawng sing 4 leh sang 5 chuang chu electric hmanga tlan tir a ni a, Vande Bharat Express rel 68 tlan tir a ni tawh a. Amrit Bharat Station Scheme hnuaiah rel Station 1300 chuang tihchangtlun tawh a ni bawk.

<><><>

UNION CABINET

Union Cabinet chuan Railway Ministry hnuaia project pahnih cheng vaibelchhe sang 6 leh 405 hu a pawm. Heng project te Jharkhand-a Koderma-Barkakana Doubling leh Karnataka-a Ballari- Chikjajur Douling rel line te an ni a. Union Information and Broadcasting Minister Ashwini Vaishnaw chaun Koderma-Barkaka Doubling project hi km 133-a thui tur niin thinglang khua 938-a cheng mi nuai 15 tan inkalpawhna a tihchangtlun phah dawn a ti a. Jharkhand-a district pali- Koderma, Chatra, Hazaribagh leh Ramgarh te a tan tlang dawn a ni.

Pu Vaishnaw sawidanin Ballary-Chikjajur project hi km 185-a thui niin Mangalore port atanga Secunderabad inkar a ni a. He project hian Karnataka-a Ballari leh Chitradurga district leh Andhra Pradesh-a Anantapur district te a pawh dawn a ni.

<><><>

HEATWAVE

Ramchhung hmarlamah khaw lum a zual zel a. Punjab-a Bathinda ah chuan nimin khan celsius degree 47.6 a kai a. Rajasthana Ganganagar ah chuan celsius degree 47.6 a kai a. Jammu and Kashmir-ah pawh khawlum ber lai thlengin Jammu ah chuan celsius degree 44 a kai a ni.

MeT department chuan ni engemawzat chu khua ala lum dawn niin a sawi lawk a. Met Deparment chuan Madhya Pradesh hmarlam, Jammu and Kashmir, Ladakh, Gilgit-Baltistan, Muzaffarabad, Himachal Pradesh, Haryana leh Uttar Pradesh khawthlang lamah khua a lum zual dawn a ni.

<><><>